

3 Juan

Juan ishīm Gayo saludo.

¹Yok Juan. Yok anciano uje tikibey Porrosht aabo. Gayo, tichew ana hutita tokosim owa. Yok ich tahmūr pishi owa. ²Pishibiche, shish yok orar tapur Porrosht par owa. Itso uje ahmūr Porrosht ich sehe tuu nos ebiyo tokole om hn sehe tuu owa owich om. ³Uje Porrosht aabo yewo otaachīhi lika hn otatim yok uje ahakōr uje ich ompa ich shuu yok aylpa. Ich ūru uje ahakōr uje Porrosht ahwoso tata. ⁴Owa shi owa itso pijit pork tuu amsahani par Porrosht aap. Uje tukunt uje pijo oshiyokōr uje Porrosht ahwoso tata ich shuu yok aylpa. Nihyok yeēk pwele shuu yok ma ayła je erze.

⁵Pishibiche, ich ihīrtpa uje akashīm Porrosht aabo yewo, hn ich ma ihīrtpa uje akashīm erze Porrosht aabo yewo uje otāra dukul dich uje ye eraha ōrpe. ⁶Wir ōr eyucha owa iglesya ahoni. Otatim Porrosht aabo uje ahmūr ōr hn akashīm ōr. Ahakōr uje ich om uje akashīm ōr uje otīr lekītiyo. Ich om uje yakashīm erze uje oshiyokōr Porrosht ibiyo oshuu itsorz. ⁷Wir otīr lekītiyo par uje oshiyokōr Porrosht ibiyo. Shi otsahmūr uje Porrosht aabo oshīm ōr uje ōr nesita. Ye onahmūrpe uje yewo oshīm ōr uje ōr nesita. ⁸Eyok tyenij nos yakashīmlo Porrosht aabo uje ōr ibiyo itso wir, heke uje yakashīmlo ōr yuhu itsorz ich wir eyok ihyēro par yanimirāha Porrosht ahwoso.

Diótrefes ir iluu ich mihnū hn Demetrio ir iluu ich om.

⁹Tichew hutita par tokosim Porrosht aabo uje ode iglesya ehēt per Diótrefes sitak. Shi sahmūr uje sehe duhu ire dichīhi wahacha heke wichi ye tola yokpe. ¹⁰Kimiji uje takaachīhi wahacha nehe ich tibite orhōta erze uje ire shiyokōr. Wichi shish chish majamichīhi yok. Ye shi erzepe uje shiyokōr. Ye nahmūr uje Porrosht aabo yewo otīr irpe, hn sontew Porrosht aabo uje ōr ayła uje erze yewo otekirīhi ōr. Erze uje sehe otakashīm ōr ich wichi chiyuhu orīhi iglesya ehēt. ¹¹Pishibiche, ye eēt erze uje oshiyokōr uje ich mihnūwo. Shi eēt erze uje oshiyokōr uje ich om. Erze uje oshiyokōr uje ich om oshuu imeheeych uje ōr ire Porrosht aabo per erze uje oshiyokōr uje ich mihnūwo wir ye odiraha Porroshtpe.

¹²Nos otata uje Demetrio ich ir iluu om. Porrosht ahwoso chibite orhõta uje wichi ir iluu ich om, hn yok tikiraha uje ir iluu ich om toy, hn eraha uje yok shish tiita uje ich ũru.

Porrosht aabo oshim Gayo saludo.

¹³Titim owa. Kuche kihniya de uje sehe tichew titim owa per ye tichew tibite hutitape. ¹⁴Sehe takaha tifir owa shichish par yikitkerye. ¹⁵Sehe tuu Porrosht shish duhu ehet kiis. Uu owa ahire oshim owa saludo, hn nos tokosim uu pihyere or saludo toy.